

L'Alma ei buca turnada bugen

Patrizia Parolini ha prelegiu ella Biblioteca Lumnezia a Vella

■ (fmr/abc) Il cudisch ei cumpariu avon in onn e miez. Ed ei para dad esser in «longseller». Il roman historic-biografic «Almas Rom» cumpara uonn en tiarza ediziun. Vendergis ha l'autura Patrizia Parolini prelegiu ella biblioteca a Vella. «Tgi che viva cheu sto esser sper ils calzers», ha la giuvna da 17 onns getg per sesezza cu il tren ei arrivaus alla staziun a Poschiavo. Ella saveva buca calar da scurlar il tgau. E cheu dueva ella viver d'ussa naven? fuv'ella sedumandada gia cu il tren dil Bernina fuv semess en moviment a Tirano en direziun Svizra. Pli lunsch siadora ch'el carrava, pli aulta la pezza e pli stretga la Val. Lu a Poschiavo, quella pintga casetta, quei dueva esser la staziun principala? Nuncapeivel per la matta che fuv naschida 1894 e carschida si el marcau da Roma. Ses geniturs Cristoforo ed Anna fuvan emigrai dil Puschlav e s'establi alla Via Merulana. Ella vischinonza dalla piazza Santa Maria Maggiore han els fundau ina cafebar cun pasternaria.

In longseller

Alma e ses fargliuns termagliavan silla piazza, la famiglia Luminati s'udeva tiels nundumbreviels pastiziers emigrants. Roma ei stada la patria dad Alma. Per quella ha ella schau encrescher. Il bab fuv vegnius grev malsaus, aschia ch'il miedi ha cussegliau da turnar a Poschiavo. 1911 ei la famiglia returnada ella Val. Alma ha stuiu entscheiver ina nova veta, denter cuolms che smaccavan pulit.

Aschinavon il connex e cuntegn dil roman «Almas Rom» da Patrizia Parolini. Sin varga 400 paginas raquenta ella la

historia da sia tatta. L'autura ei carschida si a Glion e viva dapi 1994 a Cuera. Siu bab Bruno e sia mumma Elsa naschida Lanfranchi ein omisdu Puschlavins e vivan aunc oz a Glion. Il bab ei staus inschignier forestal e responsabels pils uauls lumnezians.

Vendergis sera han las dunnas dalla Biblioteca Lumnezia envidau ella da preleger dall'ovra litterara. Uonn cumpara il cudisch ella tiarza ediziun, ei para d'esser in longseller. Patrizia ha studegiu a Friburg, oz eis ella giurista alla Dertgira administrativa dil Grischun e mediatura. La giurisprudenza ei ina materia plitost schetga e formala. Scriver in roman metta perencunter autras cundiziuns, ins astga luvrar cul fictiv e formular creativ. Varga diesch onns hagi ella giu da retschercar, preparar e scriver la historia da sia tatta, ha Patrizia Parolini getg. Fatgs, documents, schabetgs e raquens orals ha ella rimnau pil cudisch. «Almas Rom» ei il resultat da retschercas minuziusas dallas ragischs. Igl ei la historia dad Alma Parolini-Luminati (1894–1976). Nums e raquintaziun seigien fictivs, ha la biadia Patrizia Parolini puntuau, tut sebasea denton silla biografia reala dalla tatta.

Contrasts

Ella biografia sfundr'ins ella Belle Epoque, il «bi temps» da grond svilur e progress, tochen che l'Emprema Uia mundiala ha fatg in tagl anetg. Auditoras ed auditoras ella biblioteca han tedlau parts ord il cudisch e saviu s'imaginar Alma els loghens d'acziun, a Ruma, sin viadi, a Cuera ed Arbon. A Cue-



Durant sia prelecziun ha Patrizia Parolini mussau diversas fotografias dalla «Belle Epoque».

FOTO A. BEELI

ra eis ella stada en piazza tier la fatschenta dallas soras Veraguth alla Via dalla Posta. El «Marienheim» havev'ella alloschi. Lu ha la giuvna luvrau ad Arbon en ina surcusaria. Leu fuv ella 1918, igl onn dalla gripa. L'autura scriva el cudisch da quella malsogna e co ella ei rutta ora. Entuorn 1930 ei Alma maridada. La lectura dad «Almas

Rom» para in contrast. Ins frunta sin reh e pauper, rural e mondan, Svizra ed Italia, talian e tudestg, pasch ed uia. Mo lu era las midadas – ier ed oz, Ruma e Grischun. Ch'il cudisch ha in tal success ha forse in connex cun destins semeglionts. Adina puspei aud'ins d'ina tatta ni basatta ch'ei naschida a Paris, a Lyon, a Firenze, e ch'ha stuiu returnar, passentond ina veta

mudesta da pura cun numerus affons. La proxima sentupada ella biblioteca a Vella – ei vegn ad esser la quarta suenter l'avertura il settember 2019 – ei nuota meins empermettenta. Ils 22 da mars vegn Arno Camenisch, il «shootingstar» dils scribents svizzers contemporans, a preleger da siu cudisch niev ch'ei cumpariu igl onn vargau.